



KERATAN AKHBAR

AKHBAR	:	SINAR HARIAN			
TARIKH	:	1/1/2019	MUKA SURAT	:	17
JABATAN	:	KATS / NRE / JABATAN PERHUTANAN			
KLASIFIKASI	:	PERHATIAN			

Pelihara hutan paya bakau

KUALALUMPUR - Persatuan Pendidikan dan Kebajikan Jaringan Nelayan Pantai Malaysia (Jaring) menggesa kerajaan menghentikan tebusguna untuk pembangunan akuakultur, pertanian dan industri di kawasan hutan paya bakau.

Timbalan Pengerusi Jaring, Che Ani Mat Zain berkata, tragedi tsunami 2004 mengorbankan 227,898 nyawa dan Malaysia antara negara yang terkesan perlu diambil pengajaran.

Menurutnya, Jawatankuasa Operasi Menanam Pokok Bakau dan Spesies Yang Sesuai di pesisiran pantai Negara ditubuhkan Kementerian Sumber Asli dan Alam Sekitar (NRE) bertujuan memelihara dan memulihara ekosistem hutan paya bakau dipesisir pantai negara.

"Kerajaan membelanjakan jutaan ringgit setiap tahun untuk melaksanakan aktiviti pemeliharaan dan pemuliharaan hutan paya bakau seperti penanaman pokok bakau dan kempen kesedaran melalui Jabatan Perhutanan dan juga pertubuhan bukan kerajaan (NGO).

"Selain melindungi pesisiran pantai, ekosistem hutan paya bakau dan laut turut berperanan sebagai tempat pembiakan dan pembesaran (nursery) kepada sebahagian besar hidupan laut (ikan,

udang, ketam dan lain-lain) sebelum berpindah ke kawasan laut yang lebih dalam," katanya.

Katanya, Jaring menyambut baik keputusan Menteri Pertanian dan Industri Makanan Negeri Sabah, Datuk Junz Wong yang membatalkan kelulusan membina kolam udang tambahan di atas seluas 400 hektar kawasan hutan paya bakau di Pitas.

"Langkah tersebut harap dicontohi oleh kerajaan dalam melindungi ekosistem hutan bakau negara yang semakin terjejas dengan pelbagai ancaman dan kemusnahan ekosistem hutan paya bakau seperti di Batu Maung, Pulau Pinang.

"Pengekalan hutan bakau Pulau Kukup sebagai Taman Negara Johor oleh Istana Johor dan kerajaan juga adalah langkah positif yang akan memberi manfaat kepada masyarakat khususnya komuniti nelayan," katanya.

Justeru, Jaring menggesa Perdana Menteri, Tun Dr Mahathir Mohamad dan Menteri Pertanian dan Industri Asas Tani, Datuk Salahuddin Ayub bertindak tegas dengan menghentikan tebusguna dan pembangunan kawasan hutan paya bakau untuk kegiatan akuakultur, pertanian dan industri di hutan paya bakau.